

ԱՐԽԻՎԱՅԻՆ ՎԱՎԵՐՍԱԳՐԵՐ ԿԻՒԿԻԱՅՈՒՄ Ս. Դ. ՀՆՉԱԿՅԱՆ
ԿՈՒՍԱԿՑՈՒԹՅԱՆ ԳՈՐԾՈՒՆԵՈՒԹՅԱՆ ՄԱՍԻՆ

1890-ական թվականների սկզբներին Ս. Դ. հնչակյան կուսակցությունն ակտիվ գործունեություն էր ծավալել Կիլիկիայում՝ նպատակ ունենալով Սասունի հետ միասին այն դարձնել իր գլխավոր հենակետը ազատագրական պայքարի ծավալման, օսման-յան բռնատիրության դեմ պայքարի գործում:

Կիլիկիայում հնչակյան կուսակցության ականավոր գործիչներից էր Ադասին (Կարապետ Թուրսարգսյան): Ս. Դ. հնչակյան կենտրոնի կողմից նշանակվելով տեղի կուսակցության ընդհանուր ներկայացուցիչ՝ նա 1892 թ. աշնանը ապստամբության նախապատրաստման հանձնարարականով անցնում է երկրամաս՝ ստեղծելով մասնաճյուղեր, կազմակերպելով հայդուկային խմբեր, զինված ջոկատներ:

1895 թ. գարնան և ամռան ամիսներին Կիլիկիա է մտնում հնչակ գործիչների 2 խումբ, որոնց հայրենանվեր գործունեությունը չհապաղեց տալ իր պտուղները: Նրանք ինքնապաշտպանության պատրաստեցին և զինեցին Սվետիան, Դյորթ-Յոլը, Քեսապը, Ջեյթունը, Ֆոնուզը: Ադասին նրանց բաշխում է ըստ բնակավայրերի՝ համապատասխան հանձնարարականներ տալով¹: Վերջիններիս կազմակերպած հայդուկային խմբերը զգալի ավանդ ներդրեցին թուրք ջարդարարների դեմ մղվող պայքարում՝ հերոսության հրաշքներ գործելով ոչ միայն Ջեյթունում, այլև բազմաթիվ բնակավայրերում՝ հետ մղելով թուրք հրոսակների հարձակումները, փրկելով հայրենակիցների կյանքը: Կարելի է համաձայնել Հր. Տասնապետյանի տեսակետի հետ, որ Ջեյթունի ապստամբությամբ վերջ պիտի գտներ հնչակյան կուսակցության վեցամյա շքեղ, բայց կարճատև հերոսապատումը²:

Կյանքը և տարիների ընթացքում կուտակած պայքարի փորձն անում էին իրենց շտկումները, փոխվում էր կուսակցության մարտավարությունը, առաջ էին քաշվում նոր խնդիրներ, որոնց լուծման համար անհրաժեշտ էին նոր մոտեցումներ: Այդ հարցերն էին, մոտեցումների տարբերությունները, որոնք քննարկվեցին Լոնդոնի համագումարում և պատճառ դարձան կուսակցության պատակտման: Արևմտահայ հնչակյանները բաժանվում են Ա. Նազարբեկյանից՝ առաջնահերթ խնդիր համարելով արևմտահայության ազատագրումը և հրաժարվելով սոցիալիստական գաղափարա-

¹ Պատմություն Ս. Դ. Հնչակյան կուսակցության, հ. Ա. Բեյրութ, 1962, էջ 172-174: Ռ. Գ ա ս պ ա ղ յ ա ն. Հայ ազգային կուսակցությունների գործունեությունը Կիլիկիայում 19-րդ դարի վերջին և 20-րդ դարի սկզբին. - Հայոց պատմության հարցեր, -11, գիտական հոդվածների ժողովածու, Երևան, 2010, էջ 160

² Հ. Տ ա ս ն ա պ ե տ յ ա ն. Պատմություն հայ հեղափոխական շարժման և Հայ հեղափոխական դաշնակցության, Լիբանան, 2009, էջ 84: Հայաստանի ազգային արխիվ (այսուհետև՝ ՀԱԱ), ֆ. 453, ց. 1, գ. 70, թ. 28:

խոսությունից: Սա հիմքն էր նոր կազմակերպության, որն ավելի ուշ՝ 1898 թ. ստացավ Վերակազմյալ հնչակյան կուսակցություն անվանումը:

1896 թ. վերջերին հնչակյան նոր կենտրոնի կողմից հայ ազգային-ազատագրական շարժման հայտնի գործիչ Ապահ Պետրոսյանը (Պետրոս Գրվարյան) նշանակվում է Կիլիկիայի ընդհանուր ներկայացուցիչ՝ ղեկավարելով Կիլիկիո նորընտիր վարչությունը: Աշխատանքները կազմակերպելու համար նա հաստատվում է Կիպրոսում: Ապահին հղած նամակում Ադասին խորհուրդ էր տալիս գործել խիստ զգույշ, իրավիճակը չլարել և զուր տեղը չգրգռել թուրքական մոլեռանդությունը, աշխատանք տանել ժողովրդի «տնտեսականապես հարստանալու» ուղղությամբ, աստիճանաբար նախապատրաստել համաժողովրդական ապստամբությունը: Մակայն աշխատանքներն անհրաժեշտ թափով առաջ չէին գնում: Պատճառը կոտորած, ավեր ու թալան տեսած կիլիկիահայության ոչ միանշանակ վերաբերմունքն էր հեղափոխական գործիչների նկատմամբ:

Ծանր հարված էին կրել նաև Կիլիկիայում գործող հնչակյան կառույցները: Կուսակցականների մեծ մասը ձերբակալվել էին, մի մասը՝ հեռացել էր կրամասից, մյուսներն էլ մատնվել էին անգործության: Անհրաժեշտ էր շատ բան նորից սկսել, ինչին էլ ձեռնամուխ է լինում Ապահը:

Հրապարակվող վավերագրերը վերաբերում են կուսակցության գործունեությանը Կիլիկիայում 1896–1898 թթ.: Դրանք ընթերցողի ուշադրությանն են ներկայացվում կրճատումներով, թողնելով մեզ հետաքրքրող հարցերին վերաբերող մասերը: Բնագրերի շարահյուսությունը և կետադրությունը պահպանվել են, բայց փոխվել է ուղղագրությունը:

ՌՈՒԲԵՆ ԳԱՍՊԱՐՅԱՆ

-1-

ՔԱՂՎԱԾՔՆԵՐ ԱՎԵՏԻՍ ԵՎ ՄԱՐՈ ՆԱԶԱՐԲԵԿՅԱՆՆԵՐԻՆ
ՌԻՂՂՎԱԾ ՎԱՐԴԱՆԻՅ՝ ՆԱՄԱԿԻՑ՝ ԿԻԼԻԿԻԱՅՈՒՄ ԻՐ ԾԱՎԱԼԱԾ ԳՈՐԾՈՒՆԵՈՒԹՅԱՆ
ՄԱՍԻՆ

[Հունվար, 1896 թ.]

1895 – 2 օգոստոսին Կիլիկիայի վարչության որոշմամբ ինձ գործել ու պաշտոնավայր որոշվեցավ փայասի, Ա. Բ. և Գ. Մարաշի մասնաճյուղերը որով մի քանի օր ճանապարհորդել են վերջ եկա Մարոյի մասնաճյուղերին⁴

³ Վարդանը (Գարություն Խանիկյան) Կիլիկիայում Ս. Դ. հնչակյան կուսակցության առաջին գործիչներից է, որը նշանակվել էր Մարաշի և Պայասի մասնաճյուղերի պատասխանատու:

⁴ Կիլիկիայում գործող Ս. Դ. հնչակյան մասնաճյուղերի մի մասի կուսակցական ծածկանունը: Այդպես է անվանվել ի պատիվ Մարո Նազարբեկյանի: Կիլիկիան կուսակցության կողմից պայմանականորեն բաժանվել էր «Արո» և «Ավո» (Ավետիս Նազարբեկյանի անունով) մասնաճյուղերի, որոնք, իրենց հերթին, ըստ բնակավայրերի բաժանվում էին ավելի փոքր մասնաճյուղերի:

մեջ ու այն ժամանակից մինչ ցայսօր չեմ ուզած ձեզի երկար նամակներ գրել, բացի տեղեկագրություններից, թեև շատ մը նամակներ ալ գրած եմ բայց չեմ գիտեր թե տեղ հասան, թե ոչ. որովհետև մինչ այժմ և ոչ մի տող գրություն ստացած չեմ, աստոր համար կասկածի մեջ եմ, թե արդյոք նամակները և գրությունները չեն հասներ որ ոչ մի պատասխան չենք ստանար⁵:

– Երբ հասա Ալեքսանդրեթ⁶, նոյն միջոցին Ֆահրատի⁷ քով տեսա մի նամակ, որին պարունակությունը հրավիրում էր հարսանիքի⁸. այդ հրավերը երբ ես տեսա ես իմ ծրագիրս փոխեցի ... ասանց ժամանակ վատնելու լեռնային ճանապարհով անցա Մարո մասնաճյուղերը:

ՀԱԱ, ֆ. 453, ց. 1, գ. 238, թ. 1–2: Բնագիր: Ձեռագիր:

-2

ՔԱՂՎԱԾՆԵՐ ՄԿՐՏԻՉ ՊԱԼՅԱՆԻՆ (ՄԵՂՐՈՒՆԻ)⁹
ՈՒՂՎԱԾ ԲԱԲԿԵՆԻ¹⁰ ՆԱՄԱԿԻՑ՝ ԶԵՅԹՈՒՆԻ ԱՊՍՏԱՄԲՈՒԹՅԱՆ ՄԱՍԻՆ

2 փետրվարի 1896 թ.

Հալեպ

Ինչպես գիտենք Ուլնի¹¹ պատերազմը սկսած ատեն շուրջը գտնված բոլոր գյուղացիք Ուլնիա ապաստանած են, թուրք կառավարությունն ալ այդ կողմերը եկած միջոցին պարապ գտնելով խեղճ գյուղացվոց տուները այրած, այգիներն ու ծառերը կտրած են, հյուպատոսներն ականատես ըլլալով, իրենց տեղեկագրին մեջ գրած են. 30.000 ավելի մարդիկ եկած են Ուլնիա: Անոնք իրենց տուները, գյուղերը երթալու որոշում տված են, ու ը գնան խեղճերը, որ տուն տեղ այգի չունին և տակավին մեծ մեծ գումարներ պիտի տան: Էջ թուրքին հասուցած վնասներն լեցնելու¹² և իրենց բարբարոսությունը զոցելու:

⁵ Կարծում ենք, որ նամակների մեծ մասն Ավետիս Նազարբեկյանը, անշուշտ, ստանում էր, բայց հաճախ չէր պատասխանում և կանոնավոր գրագրություն ապահովում տարբեր մասնաճյուղերի ու գործիչների հետ:

⁶ Ծովափնյա քաղաք Հալեպի վիլայեթում, որն իր նշանակությամբ արևելյան միջերկրականի երկրորդ նավահանգիստն էր: Ս. Դ. հնչակյան կուսակցության կենտրոնի և Գիլիկիայի միջև կապն իրականացվում էր հիմնականում Ալեքսանդրեթի միջոցով:

⁷ Խոսքը Ս. Դ. հնչակյան կուսակցության անդամ Է. Թորոս Սահակյանի մասին է, որը առաջիններից մեկը միացավ Աղասի Թորոսարզայանին և 1890-ական թվականների կեսերին զգալի աշխատանքներ էր տանում ազատագրական գաղափարախոսության տարածման ու կուսակցության մասնաճյուղերի ստեղծման ուղղությամբ:

⁸ Նկատի ունի նախապատրաստվող ապստամբությունը:

⁹ Ս. Դ. հնչակյան կուսակցության անդամ:

¹⁰ Բաբկենը 1895–1897 թթ. Ս. Դ. հնչակյան կուսակցության Հալեպի մասնաճյուղի ներկայացուցիչն էր:

¹¹ Ուլնիա – Ձեյթուն:

¹² Պետք է հասկանալ՝ վերացնելու:

Աղասիի Մերսին դրկվելը հետզհետե ստուգություն կ' առնի, Նազարեթ¹³, Աբրոն և ինքը երեքն միասին մի քանի գորքերով... պիտի հանձնվի գաղղիական շոգենավին ուղղակի Մարսելյ տանելու համար¹⁴. թրքաց կողմանե կըսվի թե սոքա Ատանայի մեջ կառավարությունը բանտարկած է, իսկ ռուս հյուպատոսի դիտողությունը այն է, թե Մերսին շոգենավ չի գտնվելուն առթիվ թերևս Ատանայի մեջ սպասել հարկ լինի, զի անկարելի է, կառավարությունը նոցա ո՛նէ միոյն թելին դպնալ: Ուստի այս մասին ինչպես նախորդ նամակիս գրած էի, սակայն նորեն կը կրկնեմ թե, եթե կարելի է, մարդ մը դրկեք Ատանա և կամ կերպով մը ստույգ տեղեկություն առնեք, նոցա գնալը կամ չը գնալը մանրամասնությամբ տեղեկանալ:

ՀԱԱ, ֆ. 453, ց.1, գ. 228, թ. 3-4: Բնագիր: Ձեռագիր:

-3

ՔԱՂՎԱԾՔ ԹՈՎՄԱՍ ԲԱՐՈՆԱԿՅԱՆԻՆ¹⁵ ՈՒՂՂՎԱԾ
ԱՊԱՀ ՊԵՏՐՈՍՅԱՆԻ ՆԱՄԱԿԻՑ

15 հուլիսի 1896 թ.
Լոնդոն

Եթե կա երկրագնդիս վրա մի վեհ և բառին կատարյալ նշանակությամբը ազնիվ գործ՝ այն է միլիոնավոր ճնշվածների փրկությանը համար աշխատելու գործը: Եվ եթե կա մի փառավոր մահ՝ նոյն գործի ճանապարհում մարտիրոսանալն է:

Մեր ազգի ներկա անտանելի վիճակը մեզ թող չի թուլացնե. որովհետև միակ չենք որ արյուն կը թափենք, զոհեր կը տանք, անոթի – ծարավ լեռները կ' ապաստանենք և այլն: Հապա՝ գազան սուլթանի բռնատիրությանը տակ գտնվող բոլոր ազգերն էլ գրեթե նոյն դրության մեջ են...

ՀԱԱ, ֆ. 453, ց. 1, գ. 5, թ. 2: Բնագիր: Ձեռագիր:

¹³ Խոսքը Ջեյթունի Նորաշխարհյան իշխանական տան ներկայացուցիչ, Ջեյթունի ապստամբության փաստացի ղեկավար Նազարեթ չաուշի մասին է: Բաբկենը սխալվում է, քանզի Նազարեթը չի լքել Ջեյթունը:

¹⁴ Ըստ թուրքական իշխանության և զեյթունցիների միջև կնքված պայմանագրի՝ Աղասին իր զինակիցների հետ իրավունք ստացավ անարգել անցնելու արտասահման: Այդ մասին նա գրում է. «1896 թ. մարտի 1-ին մեկնեցա Ջեյթունեն 3 ընկերներով և 2 թիկնապահներով (խոսքը վերաբերում է Ապահին, Մլեհին, Հրաչյա Մարալին, Գարապետին և Նշանին – Ռ. Գ.) Եվրոպա: Պիտի բանտարկվելինք, թուլությամբ ու մեղսակցությամբ անգլիական] ֆրանսիական] հյուպատոսներուն, բայց զմեզ ազատեց ռուս հյուպատոսը... Գնդապետ Յաքիմանսքին, վեհափառ ձարի հյուպատոսը, իր պաշտպան թաթերուն ներքև իտալական] հյուպատոսի աջակցությամբ զմեզ ապահով հասցուց Մերսին, ուրկե անցա Եվրոպա» (տե՛ս ՀԱԱ, ֆ. 420, ց. 10, գ. 5, թ. 2):

¹⁵ Թովմաս Բարունակյանն Ապահի քեռորդին է:

ՔԱՂՎԱԾՔՆԵՐ ԱՊԱՀ ՊԵՏՐՈՍՅԱՆԻՆ ՌԻԴՂՎԱԾ ԱՂԱՍՈՒ ՆԱՄԱԿԻՑ՝ ՀԱՃԸՆԻ ԵՎ ԻՐ
ԸՆՏԱՆԻՔԻ ԾԱՆՐ ԴՐՈՒԹՅԱՆ ՄԱՍԻՆ

22 ապրիլի 1897 թ.
Փարիզ

... Քանի մը օր վերջ, Գիլիկիայեն ընդարձակ նամակներ առի. Հաճընը կոտորածի ենթակա և պաշարման վիճակի մեջ եղած էր. պ. Աշոտը¹⁶ կը գրեր, որ 200 ոսկի հասցնելու էր, եթե ոչ «ծննդավայրդ կորած է»¹⁷: Իսկույն Արշակին հետ ... 500 ֆր. ուղարկած էր այդտեղի կարոտյալներուն համար ... գոր Արտեմիսի¹⁸ ձեռքով ուղարկեցի Աշոտին:

Միրելի Ապահ, սիրտս կտոր-կտոր է, ընտանեկան վիճակս շատ խեղճ է, շատ խեղճ ... Հայրս աղիոտորմ նամակ մը գրած էր ինձ ... կառավարությունը զինք պաշտոնանկ րրած է և շատ չարչարած, որ իր որդին եմ. ինքզինքն արդարացուցած է, որ իր զավակ Կարապետը 5 տարի է մեռած (է): Սակայն կառավարությունը Նազարբեկի հայտարարության վրա նորեն ձեռքակալած է զինք և բոլոր հարստությունն ու կալվածները գրաված է: Հայրս ... Ճարպիկությամբ մը հաջողած է փախչել անոնց ձեռքերեն և ապաստանել Ատանա: Մայրս և եղբայրներս մնացել են անոթի ճեպելի¹⁹ մեջ, չի կարող բերել տալ զանոնք. կառավարությունը լսելով, որ ես Չաք-Մարգվան մտած եմ²⁰ (անպիտան Նշանը²¹ իմ անունս չը պիտի տար) զանոնք գրավի դրած է իմ փոխարեն²²:

ՀԱԱ, ֆ. 453, ց. 1, գ. 139, թ. 2-3: Բնագիր: Ձեռագիր:

¹⁶ Աշոտ Շահրամյանը Գիլիկիայում Ս. Դ. հնչակյան կուսակցության գործիչներից էր: 1897 թ. նա Մերսինի շրջանի պատասխանատուն էր, որը համակարգում էր նաև Սվետիայի և Ալեքսանդրետի մասնաճյուղերի հետ տարվող աշխատանքները:

¹⁷ Նկատի ունի Աղասու ծննդավայր Հաճըն քաղաքը:

¹⁸ Արտեմիսը Ս. Դ. հնչակյան կուսակցության անդամ, հայ ազգային-ազատագրական պայքարի հայտնի գործիչ Միհրան Գայանն է: Նա Ձեյթունի 1895-1896 թթ. ապստամբության առաջնորդներից և մասնակիցներից էր, ղեկավարել էր իր հայրենի քաղաք Հաճընի պաշտպանությունը 1909 թ. Գիլիկիո ջարդերի ժամանակ, 1920 թ. եղել Հաճընի ինքնապաշտպանության բարձրագույն խորհրդի անդամ:

¹⁹ Մեզ չհաջողվեց պարզել, թե ո՞ր բնակավայրն ի նկատի ունի հեղինակը:

²⁰ Աղասին Չոք – Մարգվանում (Դորթ – Յոլ) գործել է 1892 թ. վերջերին՝ համագործակցելով տեղի վարժարանի տնօրեն Միհրան Գայանի հետ, որն էլ նշանակվում է հնչակյան մասնաճյուղի ղեկավար:

²¹ Ս. Դ. հնչակյան կուսակցության անդամներից, որը Աղասու հետ գործել էր Գիլիկիայում:

²² Ավելի ուշ Աղասու հայրն ազատ է արձակվում:

ՔԱՂՎԱԾՔ ԱՊԱՀ ՊԵՏՐՈՍՅԱՆԻ ՆԱՄԱԿԻՑ՝ ԿԻԼԻԿԻԱ
ԱՆՑՆԵԼՈՒ ՄԱՍԻՆ

8 մայիսի 1897 թ.
Ալեքսանդրիա

... Հավանորեն քայլ մը ես առնեմ և հոնկե²³ մտնեմ Կիլիկիա ո՛չ թե ցնորական հոյսերով ու տաք գլուխ շարժումներով քաջարի ժողովրդի մը հանգիստը, երջանկությունը և կյանքը խտովելու, այլ քարոզելու մեր եղբայրներուն համերաշխություն, ուշիմություն և բացարձակորեն խաղաղասիրական քողի տակ լուծել մնջիկ տոկուն ու հաստատուն նախապատրաստության:

Թեև մինչև ցարդ թե՛ պաշտոնական, թե՛ անհատական նամակներով և թե՛ մեր պաշտոնաթերթով²⁴ խոհեմության և իմաստության քարոզություններ կ'ընենք շարունակ, բայց կենդանի խոսքը հայտնի է, թե ավելի հզոր ազդեցություն կունենա ժողովրդին վրա. ահա այս պատճառով մտադիր եմ մեջները ուսումնասիրելու համար միանգամայն տեղվոյն վրա՝ ժողովրդին արդի կացությունը²⁵:

ՀԱԱ, ֆ. 453, ց. 1, գ. 9, թ. 1-2: Բնագիր: Ձեռագիր:

ՔԱՂՎԱԾՔՆԵՐ ԿՈՐՅՈՒՆԻՆ²⁶ ՈՒՂՎԱԾ ԱՊԱՀ ՊԵՏՐՈՍՅԱՆԻ ՆԱՄԱԿԻՑ՝ ԹՈՒՐՔԱԿԱՆ
ԻՇԽԱՆՈՒԹՅՈՒՆՆԵՐԻ ՀԵՏԱՊԼԴՈՒՄՆԵՐԻՑ ԽՈՒՍԱՓԵԼՈՒ ԵՎ ԻՐԵՆ ՓՈԽԱՐԻՆՈՂ
ՆՇԱՆԱԿԵԼՈՒ ՄԱՍԻՆ

4 հունիսի 1897 թ.
Կիպրոս

... Եթե այդտեղ մնալդ անապահով կը գտնես ու կուզես անպատճառ արտասահման անցնել, այն ժամանակ շատ կարևոր է, որ մեկնելդ անմիջապես առաջ պաշտոնդ մեկ այլ վստահելի և ճարպիկ ընկերոջ մը հանձնես ու ապա մեկնես, որպեսզի ներկա պարագաներուն մեջ գործերը չի խանգարվին ու զգալի հարված մը չի տրվի ընդհանրության օգտին:

²³ Նկատի ունի Կիպրոս կղզին:

²⁴ Խոսքը Ս. Դ. հնչակյան կուսակցության «Հնչակ» պաշտոնաթերթի մասին է:

²⁵ Ձևակերպումն անհաջող է: Խոսքը վերաբերում է տեղում գործելուն, իրավիճակին ծանոթանալուն, ժողովրդի տրամադրությունները շոշոփելուն:

²⁶ Կորյունը (Տիգրան Տոնապետյան) դեռևս Ադասու կողմից նշանակվել էր Կիլիկիո բոլոր մասնաճյուղերի միջև կապի պատասխանատու, ապահովելով նաև կապն արտաքին աշխարհի հետ: Նա իր վրա էր հրավիրել թուրքական ոստիկանության ուշադրությունը, և Ապահն առաջարկում էր վտանգի դեպքում փոխարինող գտնել իրեն:

... Լսեցինք, որ Ալեքսանդրեթի մեջ տարի առաջ ժամագործություն ընող Արաբկիր-ցի Փիլիպպոս Խասիկյանը²⁷ իր Հայրենիքեն ելնելով հող հասած է արտասահման մեկնելու նպատակով, կը գործեր շատ ճարպիկությամբ և եթե ... կը խոստանա շարունակել Ձեր պաշտոնը այն ժամանակ մենք ալ մեր կողմեն կապահովցնենք իր ապրուստի միջոցը և այլն: Հիշյալը ազգասիրական զգացումներով ինձ ծանոթ ըլլալով՝ հոյս ունեմ թե այս ազգոգուտ մեկ առաջարկը չը պիտի մերժվի հիշյալի կողմեն: Բսկ եթե հակառակ պարագային ինչ-ինչ բանավոր պատճառներով չի կարենա ընդունել, այն ժամանակ գուցե Ատանայի կողմեն մեկը գա Ձեզ ներկայանա²⁸:

ՀԱԱ, ֆ. 453, ց. 1, գ. 10, թ. 1-2: Բնագիր: Ձեռագիր:

-7

ՔԱՂՎԱԾՔ ԼԵՎՈՆ ՄԿՐՏՅԱՆԻՆ²⁹ ՈՒՂՂՎԱԾ ԱՊԱՀ ՊԵՏՐՈՍՅԱՆԻ ՆԱՄԱԿԻՑ՝
ԿԻԼԻԿԻԱՅՈՒՄ ԿՈՒՍԱԿՑԱԿԱՆ-ԿԱԶՄԱԿԵՐՊԱԿԱՆ
ՀԱՐՅԵՐԻ ՄԱՍԻՆ

5 հունիսի 1897 թ.
Կիպրոս

... Գործերը բավական լավ կարգադրված վիճակի մեջ են այժմ, իսկ երկրի մոտակա վայրերի թոյլ վիճակն ալ, կը հուսանք մոտ ատեն բարեփոխել, այդ մասին հարկ եղած թղթակցությունները և հարաբերությունները հաստատելով, ասոնք խիստ անհրաժեշտ և կարևոր են մեր ապագա գործունեության ... համար: Մանավանդ Սվետիան³⁰ և Ալեքսանդրետ, որոնք գրեթե այսօր մեր ձեռքին մեջ ունենք, միմիայն զանոնք վերջնականապես մեզ հետ կապելու և որ ամենակարևորն է՝ գաղթականության հոսանքը արգելելու համար (որ վերջերս սկսած է ավելի շարժուն կերպարանք մը առնել) պետք կզգացվի փոքրիկ գումարի մը: Այս մասին ես գրեցի մեր կենտրոնի ընկերներուն, դուք ալ կարող եք շեշտել զայն:

ՀԱԱ, ֆ. 453, ց. 1, գ. 11, թ. 1: Ձեռագիր: Բնագիր:

²⁷ Խոսքը Ս. Դ. հնչակյան կուսակցության անդամ Փիլիպպոս Խասիկյանի մասին է:

²⁸ Քննարկվում էր Կորյունին հնչակյան մեկ այլ գործչով փոխարինելու հարցը:

²⁹ Լևոն Մկրտչյանը Ս. Դ. հնչակյան կուսակցության ակնառու գործիչներից էր: 1896 թ. Լոնդոնի համագումարում արևմտահայ հնչակյանները Լ. Մկրտչյանի, Ա. Արփիարյանի, Մ. Սվազյանի, Մ. Տամատյանի և Ս. Մուրեկյանի գլխավորությամբ ընտրում են կուսակցության առանձին վարչություն՝ բաժանվելով Նազարբեկյաններից:

³⁰ Մուսա լեռան լանջերին թիկնած՝ Միջերկրական ծովի ափին գտնվող Սվետիայի շրջանում կար հայկական 7 գյուղ:

ՔԱՂՎԱԾՔ ԱՊԱՀ ՊԵՏՐՈՍՅԱՆԻՆ ՈՒՂՂՎԱԾ ՂԱՐԻԲ ՊՈՅԱՃՅԱՆԻ ՆԱՄԱԿԻՑ՝ ՀԱՃԸՆԻ
ՀԱՅԵՐԻ ԴՐՈՒԹՅԱՆ ՄԱՍԻՆ

7 հունիսի 1897 թ.
Մերսին

... Հաճրնցիք խիստ թշվառ վիճակի մեջ են, կառավարության բռնությունը խիստ շատ է ... բանտարկված են Խրտոմյան, Թերգյան³¹ և շատերը. մարդասպանը անկուշտ է, խեղճ ու անմեղները կը չարչարին, արդար դատաստան երբեք չի կա. Գայանը Ուլնիայեն հայրենիք գալեն վերջը կրկին գնաց, հունիսին Մարաշ բանտարկեցին. հիմա ներումեն ազատ է և կը գտնվի Հաճրն. վիճակնիս ձեզ ծանոթ է:

ՀԱԱ, ֆ. 453, ց. 1, գ. 77, թ. 1: Բնագիր: Ձեռագիր:

ՔԱՂՎԱԾՔ ԱՊԱՀ ՊԵՏՐՈՍՅԱՆԻՆ ՈՒՂՂՎԱԾ ՂԵՎՈՆԴ ՇԱՀՄԻՐԻՑ³² ՆԱՄԱԿԻՑ՝
ԿԻԼԻԿԻԱՅՈՒՄ ՏԻՐՈՂ ՎԻՃԱԿԻ ՄԱՍԻՆ

31 դեկտեմբերի 1897 թ.
Ֆամակուսթա

Այսօր կիլիկեցի ընկեր Սեդրաքը³³ հոս եկավ Կիլիկիո մասին կարգադրություններ մը ընելու համար, խորհրդակցելու պ. Սվազյանի³⁴ հետ, ըստ առած նոր տեղեկությանց համեմատ: Բանտարկյալները³⁵ դեռ կը մնան բանտերու մեջ, հարցաքննությունները կը շարունակվեն: Ձեյթունը պաշարված է կ'ըսվի, թեպետ այդ լուրը ստեղծող թերթին (անգլիական) ճշմարտությունը կասկածելի է, բայց ինչ որ այլ ըլլա մտահոգություն կը պատճառե, ասոնց մասին ի նչ կը խորհիք, Ձեյթունցիք ի նչ դիրք կրնան բռնել, թե ոնե բան ընելու անկարող են...

ՀԱԱ, ֆ. 453, ց. 1, գ. 86, թ. 25: Ձեռագիր: Բնագիր:

³¹ Մ. Դ. հնչակյան կուսակցության անդամներ էին:

³² Մ. Դ. հնչակյան կուսակցության Կիպրոսի գործիչներից:

³³ Սեդրակի ինքնությունը չհաջողվեց պարզել:

³⁴ Մ. Սվազյանը Մ. Դ. հնչակյան կուսակցության հայտնի գործիչներից և Վերակազմյալ հնչակյան կուսակցության ղեկավարներից էր:

³⁵ Ձեյթունի ապստամբությունից և Կիլիկիայի տարբեր վայրերում տեղի ունեցած ինքնապաշտպանությունից հետո թուրքական իշխանությունները ձերբակալել էին դիմադրական մարտերի ղեկավարներին, հնչակյան գործիչներին:

-10

ՔԱՂՎԱԾՔ ԱՊԱՀ ՊԵՏՐՈՍՅԱՆԻՆ ՈՒՂՂՎԱԾ ՄԻՀՐԱՆ ԹԵԼՅԱՆԻ³⁶ ՆԱՄԱԿԻՑ՝ ՀԱՅ
ԲԱՆՏԱՐԿՅԱԼՆԵՐԻՆ՝³⁷ ՄԵՐՄԻՆԻՑ ՏԵՂԱՓՈԽԵԼՈՒ ՄԱՍԻՆ

19 մարտի 1898 թ.
Ալեքսանդրիա

... Բանտարկյալները խմբովին հանկարծակիի եկած են մարտ 1/13 ի գիշերը... երբ
զիրենք արթնցնելով հարկադրած են իսկոյն ուղևորիլ շոգենավ մը որ կ'սպասե եղեր
Մերսինի խորշը:

Լուրը կայծակի նման տարածվեր է քաղքին մեջ գիշերանց և ծնողաց ու ժողովրդ-
յան աղէկտուր լացն ու կոծը ամենաթերթն ազդեցությունն անգամ չեն ունեցեր առա-
վոտյան հետաձգելու այդ մեկնումը, որպեսզի գեթ միջոց տրվի հայոց հոգալու իրենց
սիրելիներուն պետքերը և կամ անգամ մ'ես զիրենք ողջագուրելու:

Քահանա, վարդապետ, սարկավագ ամենքն ալ նոյն խստությամբ հսկողության
ներքն փոխադրվեր են շոգենավ. հազիվ մեկ քանի հայրեր կամ մայրեր կամ մտերիմ-
ներ համարձակեր են ճեղքել շոթան գրկելու համար իրենց մերձավորները: Շոգենավը
մեկներ է հետևյալ օր փոխադրելու համար բանտարկյալները (ըստ ոմանց Պոլսո ճամ-
փով, ըստ ոմանց Տեստե աղաճի ճամփով Էտիոնն ուր պիտի տեսնվի իրենց դատը):

ՀԱԱ, ֆ. 453, ց. 1, գ. 91, թ. 4-5: Բնագիր: Ձեռագիր:

-11

ՔԱՂՎԱԾՔ ԱՊԱՀ ՊԵՏՐՈՍՅԱՆԻՆ ՈՒՂՂՎԱԾ ԼԵՎՈՆ ՄԿՐՏՅԱՆԻ ՆԱՄԱԿԻՑ՝
ԿԻԼԻԿԻԱՅԻ ՄԱՍՆԱՃՅՈՒՂԵՐԻ ՀԵՏ ԻՐԱԿԱՆԱՅՎՈՂ
ԿԱՊԻ ՄԱՍԻՆ

15 օգոստոսի 1898 թ.
Ալեքսանդրիա

Բայց և այնպես Կիլիկիո մասնաճյուղերուն հետ եղած հարաբերույթ-
յունները, վերջին դեպքերուն բերմամբ, այսօր այդտեղի հետ մեր պաշ-
տոնական հարաբերությունները կը հաստատվեն լոկ Իսկենտերունի³⁸ ճամ-
բով Կորյունի միջոցով³⁹: Գիտեք, որ Կիլիկիան 2 նահանգային շրջանակի

³⁶ Միհրան Թեյյանը Ս. Դ. հնչակյան կուսակցության Եզիպտոսի գործիչներից էր:

³⁷ Բանտարկյալների մեջ մեծ թիվ էին կազմում մտավորականները, հայության մեջ որոշակի դիրք և
հեղինակություն ունեցող անձինք:

³⁸ Ալեքսանդրետ նավահանգիստը:

³⁹ Կորյունն այդ ժամանակ ազատվել էր բանտից:

էր բաժնված, Հալեպ և Ատանա: Մերսինի ծանոթ դեպքերեն⁴⁰ ի վեր Ատանայի նահանգին հետ լոկ անուղղակի հարաբերություններ ունենք Աշոտի և Սեդրակ Թոստումճյանի միջոցով և հրահանգներն ալ այս վերջնոց ձեռամբ հղեցինք. Իսկ Հալեպի նահանգին հետ մեր հարաբերությունները կը կատարվեն Կորյունի ձեռամբ, որուն խրկած ենք նաև ընդհ[անուր] ժողովի հրահանգները:

ՀԱԱ, Ֆ. 453, ց. 1, գ. 70, թ. 28–29: Բնագիր: Ձեռագիր:

⁴⁰ Նկատի ունի Մերսինում կատարված ձերբակալությունները: